

**Kerb 2003**

**Blaabacher**

**Straußredd 2003**

**Seite 1**

## Anfang

Ehr liewe Leit un Kerwegeschk,  
isch griß eisch all uffs allerbeschk!  
Es is kaum se galwe um trotzdem woher-  
Schunn widder is erum e Johr.  
Unn uff was han mir uns am meischde gefreit?  
Naderlich uff unser Kerb, uff was sunschd ehr Leit?.  
Jetzt stehn mir zwä do uff derer Läder druff,  
wie alle Johre, un zähle emol widder uff,  
wie sich manche im Dorf angestrengt han  
damit mir a alle was zum lache han!!  
Es is wie immer scheen un ehrlich zum lache,  
was manche fer dolle Sache mache.  
Awwer, ich wäß, ehr wolle jetzt was here,  
un mir verzehle es eisch jo a gere.  
Un net Vergesse, no de Redd gehts weiter,  
drunne im Zelt ganz luschiedlich un heiter.  
Mir danze die 3 Erschde un Ihr gugge zu,  
un dann trinkend äner in aller Ruh.  
Mir hoffe ihr hann genausoviel Spaß wie mir,  
un trinke mit uns e paar Lieder Bier.  
Bis dorthin herend eisch halt an,  
was mir do owwe iwwer eisch sahn.  
Korn, Bier, Schnaps und Wein,  
awwer mir here noch kä Lewwer schrein!!!!!!

Straußbuwe

## Krutze

Es scheenschde im Jahr is die Urlaubszeit,  
in der mer sich vun all seim <sup>Arbeits</sup>Urlaubsstreß befreit.  
Un am beschde loßt mer die Familie dehäm,  
weil allän mit den Kollesche, isses doppelt so scheen.  
Uff e sonnisch Insel wo mer gut trinke kann,  
un die Fraue nur Bikinis an han!  
Um vorher net allzuviel steß zu han,  
plant mer die Fahrt zum Fluchthafe änfach mit de Bahn.  
Versorcht mit allem was mer braucht gehts los,  
die Vorfräd uffs Urlaubsland is riesegroß.  
Un um sich so rischdisch inzustimme,  
werre e paar Bierscher getrunk um die Lewer zu trimme.  
Awwer wie ner all wisse, Bier das treibt  
Wenn do die Hos nur trocke bleibt.  
Doch Metzjersch Mardin der is trainiert,  
der wäß wie er sich net blamiert!!  
Bis zum nekschde Bahnhof kanner warde  
um dann, seine "Run" uffs Kloo zu starte.  
De Zuch halt an, de Mardin rennt los,  
jetz awwer dabber- de Druck is groß!  
Ganz entspannt un um e paar Liter erleichtert,  
is de Krutze uff ämol gar nimmi begeischdert!  
Er kommt um die Eck un kann grad noch siehn,  
wie sei kollesche samt Zuch vun danne ziehn.  
"Isch hann doch nur kurz Pippi gemacht,  
awwer mit dene Zisch is das halt so e Sach!"  
De nekschde Zuch hatter dann halt genomm,  
un is trotzdem noch pünktlich zum Fluchthafe komm!

Mardin, die Geschichte is jo echt scheen,  
awwer mensche net, es war e bissje unbequem,  
fers nekschdemo merk der ach im Zuch gebts Toilette,  
das spart der Geld un Zeit do möcht ich druff wette.

Un jetzt spielt die Musik dem Mann mit dem Kloo:  
" Es fährt ein Zug nach nirgendwo!"

## Udo

Liewe Hausfrau unn Männer das do stick is vor allem  
fer eisch von nutze,  
es sinn awwer net unbedingt Tips unn Tricks fer se  
putze.

Awwer ich denge ach fer die annere is es ziemlich  
intressant,

vorallem is der Mann glaab ich ach jedem bekannt.

Die Arwet im Haushalt is absolut vielseitich,

un trotzdem gehts em manchmol geje de Strich.

Mer kocht, wäscht, bischeit un dut butze,

un doch denkt mer, mer hätt dehäm lauder wutze.

Es koche is dodebei noch äns vun de angenehmschde  
Sache,

das dut mer vun allem noch am liebschde mache.

Doch ach dodebei muss mer Hinnernisse iwwerlischde,

unser Mann greift sogar ganz scheen dief in sei  
Trickkischde.

Er hat nämlich dene Job die Zwiwwele zu schneide,  
un do muß mer allsemol ganz scheen leide.

Mer saht jo es gäb verschiedene Tricks dodebei,

meischdens endets awwer doch mit de Heilerei.

Unser Mann hat allerdings e ganz besonnerer Trick,

er schützt änfach seine Blick!!

Allmanns Udo der is jo net bleed,

wisse Ihr wie gut dem e Taucherbrill steht?

Ihr hann ewei ganz rischdisch geheert,

eier Ohre sinn net geschdeert.

De Udo nämlich gar net dumm,

hat sich änfach die Taucherbrill iwvergeschwung!

Ihr Leid dodezu geheert ganz viel Kreativität,

dodevor isses in käm Alder zu spät.

So Ihr Hausfraue unn Männer ihr dun beim

Zwiwweleschneide am beschde immer an de Allmann Udo

denke

unn wanner kä Taucherbrill hann, dann lossent eisch

äni schenge.

Denn mit Taucherbrill, daß kann eisch de Udo mitteile,

brauch mer beim Zwiwweleschneide nimmi zu heile.

Ihr Musikande spielent em Udo jetzt net laut awwer

scheen:

"Das bisschen Haushalt ist doch kein Problem."

X  
Ute

Blaabch<sup>a</sup> is jo werklich e scheener Ort,  
wer do emo wohnt, der will nimmi fort.  
Awwer e kleener Ausfluch so ab un zu,  
der geheert änfach emol dezu.  
Doch sowas will geplant sinn, das is klar,  
sunscht hat<sup>er</sup> sich am Enn noch verfahrl!  
Die Blaabacher Fraue, ehr wisse wene ich menne,  
dun in Deitschland a noch net alles kenne.  
"Köln is scheen, dort fahre mer hin,  
dort kenne mer e haufe Sache siehn!"  
Un Schneidersch Ude hat dann gemennt,  
daß es die Sach in die Finger nemmt.  
Es ruft beim Fremdeverkehrsamt an un beschdellt,  
Prospekte vom Zielort fer wenisch Geld.  
Un e paar Dach später was e Glick,  
kriets Ude die Prospekte schunn zugeschickt.  
Voller Fräd packts schnell die Bunde Heftscher aus,,  
doch was e Schreck un was e Graus.  
Die Infozettel dies do hat,  
sinn vun Düsseldorf- do wars platt.  
Awwer es Ude jo gar net dumm,  
hat sich glei ans Telefon geschwung.  
Dene Mann am annere Enn, machts erschemol rund,  
awwer der erklärtem dann de wahre Grund!!  
Die Rufnummere vun dene Ämter in Düsseldorf un Köln. →  
sinn die gleiche,  
die dun nur von de Vorwahl vun enonner abweiche.  
Es ~~hoht~~ also die falsch Nummer gewählt,  
un hinnerher e unschuldischer Mann gequält.  
Die Kölner Prospekte hats dann Gottseidank a noch  
kriet,  
wie mer jetzt an seim grinse sieht.  
Was mer jetzt san solle wisse mer net so genau,  
awwer es Ude das is jetzt schlau,  
das guckt beim nekschdemol bestimmt doppelt so gut,  
bevors unschuldische Leit beleidische dut!!

## Benny

Am Palmsonndach, so isses Tradition,  
feiert mer in Blaabach Konfirmation.  
4 Stick ware dasjohr an de Reih,  
un die sinn jetzt all bei de Straußbuwe debei.  
Vor dem Feschk dut mer sich sei Gedange mache,  
was gibts Mittachs, was esst mer owends, un lauter so  
Sache.

Fer Beckersch un Allmanns war die Sach klar,  
no de Kersch werd zum Mittachesse uffs Huwehaus  
gefahr!

De Benny saht "Ich komm mit em Conny un em Cosma dann  
noh,

in de Kersch werre mer mit dem Klän net froh."  
Alle dann, die Sach is beschloss,  
es werre uff em Huwehaus die Konfirmande begoß.  
An dem besachte Dach, die Kersch is aus,  
macht mer sich uff de Wesch zum Huwehaus.  
Owwe ankomm werd schnell gezählt,  
damit a jo käner fehlt.

Awwer irgendwas stimmt do net,  
sie sinn änfach net komplett.  
Uff ämol werd em Uli klar:

"Ei de Benny is jo noch gar net vorgefahr.

Noch 10 Minude warde mer ehr Leid,  
dann werds awwer fers Esse Zeit."

Doch ach no 10 Minude find mer vum Benny kä Spur,

"Ei sah emol wo der dann nur?

Alex du hasch doch beschdimmt Dei Handy debei?

Dann ruf dene mo an allewei!"

Es Alex macht das dann ach glei,

un heert bein telefoniere nimmi uff mit de Lacherei,

un erklärt dann mitem e Grinse im Gesicht,

"Ewei han mir de Benny ganz scheen verwischt!!"

Ihr werres net glaawe awwer es is wirklich wohr,

de Benny hat uff fem Wesch zum Huwehaus die  
Oriendierung verlör.

Mit annere worde damits jedem werd klar,

de Benny hat sich in Kusel verfah.

Un zum Geburtsdach, das kann sich bestimmt jeder  
denge,

dut de Koko em Benny e Stadtplan von Kusel schenge.


So Benny ach wenn mir Dir nimmi gut genuch sich

bische trotzdem widder in de Straußredd drin.

Awwer Benny, mir han Dich trotzdem lieb,

un darum ~~singe mer der jetzt noch e Lied.~~

*Spitze  
des dinstags  
hoch e fink*



## Gabi

Um de lange kalde Winder zu verkürze hat sich de  
Mardin disjohr was ausgedengt,  
un de Blaabacher e Diaowend geschengt.  
An alde Zeide wollt mer sich erfreue,  
un dut weder Zeit noch Mühe scheue.  
Die Leit werre uffgeruf um alde Dias zu beschaffe,  
um die dann im Schulhaus in großer Runde zu begaffe.  
Un werklisch, die Vorführung gefällt de Leid  
rischdisch gut,  
weil sich jeder gere an Vergangenes erinnere dut.  
"Wesche noch?" un "Ach war das scheen!"  
oder "Was in Blaabach heit e haufe Heiser stehn!"  
Awwer net nur es alde, sondern ach es neije,  
dut uns all am Herze leije.  
Edingersch Gabi is begeischderd vun de neije Toilette,  
es war rischdisch neidisch, do kennt ich druff wette.  
Nur än kläner Fehler fällt em uff,  
e paar wandfließe han komische Kreizjer druff.  
"Do hann beschdimmt die Kinner geschbielt un se  
angemolt",  
unn dann hats sichs <sup>gleich</sup> gelich was zum butze geholt.  
Widder im Saal owwe hats dann em Mardin verzehlt:  
"Ich hann mich beim abwische ganz scheen gequält".  
"Du Gabi, das war werklisch nett" nennt der dann,  
"awwer das mit dene Kreizjer war mei eischener Plan.  
E paar vun denen wandfliese sinn nämlich defekt,  
un die han ich makiert un mit Kreizjer beflekt.!"  
Do konnt es Gabi nur noch sahn:  
"Mardin, das war e guder Plan!"  
Awwer jetzt wars zu spät die Makierunge ware weg,  
dodefor hotte die Fließe net äner Fleck.

## Richard

Männer sinn wie Käne Kinner, das wisse ner jo all,  
un darum is uns dasjohr widder äner besonnensch  
uffgefall!  
Im Friejhohr hat Peifersch Mardin Leit zum schaffe  
gesucht,  
un hat sich dann a glei de Gemänerat gebucht.  
Am 3. Mai isses dann soweit,  
die Gemän macht sich zum "Arwetsinsatz" bereit.  
Mit vollem Eifer un Elan,  
fangt die Baggaschese schaffe an.  
Es werre Gräwe gezoh un Kawl verleht,  
un zwischedorsch e Friehestick, damits widder besser  
geht,  
de Stromkaschde gesetzt das is jo klar,  
weil das jo schließlich es Hauptanliesche war.  
Mir sin a ganz scheen stolz uff die Männer, das is  
gewiss,  
weil ohne Strom wäre mir an de Feschdscher im Dorf  
ganz scheen uffgeschmiss  
Doch äner Mann, un jetzt werds intressant,  
dene nemmt sei Fraa noch an die Hand!  
"Komm Richard, ich glaab Du hasch fer heit genuch  
geschafft,  
mir gehn häm!" Un käner hat me was gerafft.  
Do kommt das Helga uff de Dorfplatz getappt,  
un hat sich seine arme Mann geschnappt.  
Ihr Leit guggend net so, es is werklich wohr,  
mer kennt menne es Helga hätt de Verstand verlor!!  
Die Blaabacher Fraue komme net uff so Idee,  
die sinn froh, wenn se ehr Mannsleit mo e paar Stunn  
net sehe.  
Un selbschd wenn die so Infäll hätte,  
Ehr Leit, do dät isch meine Arsch druff verwette,  
Die Männer däte san: "Jo, Aldi sei still,  
ich gehn häm wann ich will!!!!!"  
  
Un jetzt Richard komm emo ganz nah.  
die Musik spielt Dir: "Das Sandmännchen ist da!"



## Daniel

Am 30. April is bei uns im Dorf was los,  
Hexenacht werd gefeiert un zwar rischdisch groß!  
Uffm Dorfplatz werd e großes Feier gemacht  
un bei e paar Bierscher iwwer das än odder anner  
gelacht.

Wenns rischdisch dungel is, isses dann soweit,  
mer macht sich traditionell zum "hexe" bereit.  
Von Haus zu Haus werd alles abgeklappert,  
vom Liegestuhl bis zum Fahrrad, alles werd ergattert.  
Un bei ganz spezielle Kandidaten,  
dun Nachts noch ganz annere Überraschunge warte!  
So hammer am Neie Wesch dasjohr entdekt,  
was Familie Becker hinner ehre Haus versteckt.  
E ganzer Stapel Plaschdersteen stehn dort-  
un die platziere mir an e annerer Ort.  
Vor die Hausdeer nämlich hammer se getra-  
wenn das net e guder Infall war!!  
Uff ämol geht vorne e Fenschder uff  
unn Beckersch Dani hängt halwer uffm Fenschdersims  
druff.

"Was machen Ihr do, was is'n do los?"  
Unser Entsetze war erschemo riesegroß.  
Es hat net lang gedauert, dann war klar,  
vum Dani erfährt nimmand, wer das mit de  
Plaschdersteen war!

Ihr denge jetzt beschdimmt "De Witz hat gefehlt",  
Awwer dene kriener jetzt noch verzehlt.  
Es klän Beckersche war nämlich ganz froh uns zu siehn,  
So muscht er nämlich net "stifte" gehn!  
Der hot vorher was geheert hinnerm Haus,  
un wollt dorch sei Fenschder schnell enaus.  
Er hot Angscht daß ne de Inbrecher klaut,  
un net gedenkt, daß jemand die Hausdeer zubaut.

So Daniel die Musik spielt Dir jetzt ganz allein:  
Horch was kommt von draußen rein!

## Bodo un Udo

Männer un Technik, das is so e Sach,  
die Erfahrung han dasjohr mo widder 2 dolle gemach.  
Jede Samschdach das is jo klar,  
hocke se sesamme zum Fußballgugge, de Betze spielt  
"Hurra".


Mit Premiere is das jo heit so scheen,  
mer brauch nimmi in Elletange Staus zu stehn.  
Es Geld fer die Karde hat mer a net verbrasst,  
un Dank Zeitlupe kä Faul un a kä Abseits verbasst.  
Ach wie is das jed Woch so scheen,  
wenn de Bodo un de Udo beis Alex Fußballgugge gehn!  
Do laaft schun de Fernseher es spiel beginnt,  
wenn mer nur es rischdische Kneppsche finnd!!  
Es Alex kennt sich aus, das wäß bescheid,  
un macht wenns net do is alles bereit.  
Es zeigts em Bodo un erkärt genau wo er muß drigge,  
damit die zwä net in die Röhre blicke.  
"Ach das is doch kä Problem" nennt de Bodo,  
"un außerdem is de Udo jo a glei do."  
Es Alex geht, un was dann bassert is wäß käner so

genau,  
uff em Bildschirm sinn plötzlich nur noch Streife in  
rot, weiß un blau.

Kä Fußball, Kä Männer un ach kä Ball,  
is vielleicht es Programm ausgefall?  
Am Fernseh geht nix me es is e Schand,  
do sinnse gejeiwwer bei de Fiddi gerannt.  
"Du hasch doch a Premiere un wäsch beschdimmt wies  
geht",

Awwer de Dieder is genauso bleed.  
"Ne, ne, das macht bei mir immer es Helga an  
ich traue mich an die ganz Techik ach net dran."  
Zum gude Schluß hanse dann all in Close gesess,  
un ihr peinlich Aktion beim Alex vergess.  
Das hott dann Nachts noch e Rieseproblem,  
de Fernseher widder in Gang se krien.  
E stunn lang hatt das do gehockt,  
bevors de Glotze widder e Bild entlockt.

Un jetzt ehr leit will ich net here,  
das kann doch jedem emol bassere!!  
Es is bewiss un loßt sich net verdrehe,  
Männer un Technik, das sinn 2 welde die sich anfach  
net verstehe!!



## Inge Grimm

E Fraa vun de Hauptstroß hat ehr Schränk geleert,  
ab un zu macht mer daß, wie sich das so geheert.  
Ei do sinn jo e paar ganz alde Schuh zum Vorschein  
komm,  
die ware sofort in Beschlag genommt.  
"Ach was konnt ich in dene immer gut laafe" sat se zu  
ihrem Mann,  
"Ich hann iwwerhaupt net gewuscht, daß ich die noch  
hann!"

Sie muß noch no Kusel laafe, was soll ich sahn,  
naderlich zieht se die alde Schuh an.  
Im Wald merkt se, die sinn nimmi so gut wie se ware,  
an de Tennishall denkt se: "Ich bin viel besser drin  
gelooff vor Jahre"

Do werd se von Hennschens Ude mit genommt,  
das war jetzt grad rischdisch komm.  
Am Markant hat es Ude Grimme Inge dann abgesetzt.  
Das laaft 3 Schritte, guckt uff sei Fies un is  
entsetzt!!

Die Sohle hodde sich fascht abgelöst,  
die Riemscher hinge e weg un die Strimp ware entblößt.  
Ach Gott wie peinlich, em Inge wars net geheier,  
jetzt war werklisch guder Rat deier.  
"Ach ich dun jo im Markant jemand kene"  
So schnell es geht duts dort anne renne.  
Die Fraa hott dann ach Gott sei Dank,  
paar alde Schuh hinne im Schrank.  
Die basse sogar, was soll ich sahn,  
es Inge zieht se dabber an.

De Hennschen Gerhard saht middachs zu seiner Fraa:  
"Im Audo leit e Sohl, e Riemsche un e Schnall a.  
Ei es is mir jo grad so vorkomm,  
Als hättsch Du e Penner mit no Kusel genommt.

<sup>INGE DIT</sup>  
Ehr Musikande spielend em Effet:  
"Mei Fies dun weh, wenn ich als no Kusel geh!"

## Scott

Uff em Mauerwesch do wohnt e Mann,  
der stellt vielleicht als Bleedsinn an.  
Ich wäß net, ob ma ne do unne sieht,  
uff jedefall hat er Hausnummer 10 gemiet. *auch*  
Im Friejhohr war er Inkaafe, do sieht er ~~acuh~~  
e wunnerscheener Gardeschlauch.  
Ach so e Schlauch, der wär vun Nutze,  
ich kennt Blume gieße uns Audo butze.  
Gesgt getan ein Mann ein Wort,  
de Scott kauft dene Schlauch sofort.  
Dehäm do war der noch viel schneller  
springt glei mit dem Schlauch in de Keller.  
Schließt ne an un laaft mim Schlauch in de Garde,  
steht dort un dut uffs Wasser warde.  
Nur veränzelt Tröpfscher komme e raus,  
er ruft iwwer sei Fraa, die war im Haus.  
"Warum um alles in der Welt,  
hascht Du mers Wasser abgestellt?"  
Die ruft zurick voller entsetze:  
Ei Du duscht jo de ganze Keller benetze.  
Was hasche dann do kaaf, mer kann Dich nix häße,  
Bewässerungsschlauch steht druff, kannschd Du net  
lese?"  
Jetzt wurd dem Scott ach langsam klar,  
warum der Schlauch so billisch war!  
  
Ehr Musikande spielend em Scott mit Mut:  
"Es kommt die Flut, es kommt die Flut"

## Frauen

Jetzt sinn jo in Blaabach lauder aktive Fraue,  
ehr brauche eisch bloß emol um zu schau.  
Ens, zwämol im Johr setze die sodann  
e Fraewannerdach auch an.  
Mittlerweile hat wohl a jeder geheert,  
Metzjersch han Blaabach de Rücke gekehrt.  
Vorsjohr no de Kerb sin se no Kindenheim gezoh,  
do wollde die Fraue mo siehn wo ane, das is halt so!  
Im Friehjohr Ihre Wannerdach, das is jo klar,  
daß dene ihr Ziel dann Kindenheim war.  
Jetzt, ob ehre glawe odder net ehr Leid,  
der Wesch war dene e bissje weit.  
So sinn se zum Entschluß dann komm,  
bis Grienstadt werd de Zuch genomm.  
10 Fraue wares dann an der Zahl,  
2 wocheenn Tickets <sup>fast</sup> optimal.  
Geplant war vun Grienstadt no Kindenheim zu laafe,  
E Weinprob se mach<sup>en</sup> un e paar Fläschelscher se kaafe.  
In Derkem macht der Zuch plötzlich de Rickwärtsgang  
enin-

"Weinprob adee'" kommts de Fraue in de Sin!  
Panik macht sich bei unsere Fraue breit:  
Was mache mern jetzt, wie gehts weider ehr Leit?  
Wo fahrt der Zuch mit uns nor hien,  
wie solle mir jetzt em Heidi sei nei Heimat siehn?"  
Doch ware die 10 uff amol so froh,  
er hat de Blinker gesetzt un is no Grienstadt abgeboo!!  
die Weinprob hat dann alles vergess gemacht,  
un heit werd iwwer die Sach nur noch gelacht!!

Die Musik spielt eisch Fraue jetzt ganz froh:  
"Es fährt ein Zug nach Nirgendwo!"

## Kescheler

vielleicht is es eisch schunn uffgefall,  
die Straußredd is jetzt faschd gehall,  
doch ebbes hat uns noch gefehlt  
un das krien Ihr jezt ach verzehlt.  
E paar Persone duner beschdimmt vermisse,  
die eigentlich in jedi Straußredd müsse.  
Awwer kä Angschd unser Crew hat sich angestrengt  
un uns aach widder e Stiggelsche geschenkt!!  
Freidachs owends is das bei dene Gesetz,  
werd no Bedesbach zum keschele gewetzt.  
Un wie anstrengend so e Keschelowend is,  
wäß beschdimmt jeder, das is Gewiss.  
Um dann später widder zu Kräfte zu komme,  
werd noch e Schlummertrunk zu sich genomme!!  
Ob in Schneidersch, Beckersch odder in Reisse is egal,  
Hauptsach mer erholt sich von der sportliche Qual.  
Awwer uff em Hämwesch stell mer dann feschd,  
"Es letschde Bier war ganz beschdimmt schleschd.  
Odder han ich mich beim Sport iwwernomm,  
un die Fallsucht hat in mir Iwwerhand genomme."  
De Reiss walder is nämlich geje de Schlofzimmerschrank  
geknallt,  
Schneidersch Ude kriet erschd in Reisse ehrm Dannebam  
halt.  
Beckersch Ulli hat noch bis hām geschafft,  
awwer im Bad hats es dann a noch hingerafft.  
De läng no leits in de Badewann,  
eraus kommts nur mit Hilfe von seim Mann.  
Awwer daß die Fallerei net nur vom Keschele is,  
hats Ulli Sunndachs am Altstadfeschd bewiss.  
Do hat sichs nämlich a widder abgeleht,  
e wunner, daß es heit noch steht!!  
  
Ob jetz Sport Mord is, odder die Fallsucht der Grund,  
die Musik spielt sich fer eisch jetzt die Finger Wund.  
Un zwar mit: "Falleri und Fallera,  
Gott sei Dank steh ich noch da!!"